

Fraccion di AVP a pidi reunion publico riba parkietenbos dump

ORANJESTAD (AAN): Pueblo di Aruba y especialmente habitantenan den vecindario di Parkietenbos Dump tin varios aña ta warda riba un solucion pa Parkietenbos Dump cu pa decadas ta den discusion. E contaminacion di aire, tera y lama cu e dump ta ocasiona ta inmenso.

Tambe bestianan indesea

manera djaca, raton, cacalaca y musca ta bruy na abundancia riba e dump aki. Tambe tin hopi cacho ta worde laga atras akinan y tin cu ta yega eynan pasobra den e desperdicio tin cuminda. Naturalmente nan ta haya yiu y keda multiplica riba e tereno.

Constantemente tin candela riba e tereno cu ta ‘corta cara’ di ta un pais turistico y cu ta

resalta mundialmente pa nos intension di bira un pais cu tin como meta pa yega na 100% energia alternativo. “E ultimo impresion di e turista ora e ta na aeropuerto wardando riba su vuelo pa regresa su pais, ta candela y huma contamina di e dump”, Rasmijn ta expresa cu un disgusto grandi. En berdad cu ora cuminda y mata worde acumula di e cantidad cu tin riba Parkietenbos dump, biogas lo worde forma y lo existi den e subsuelo. Esaki facilmente por pega candela ora un chispa cay den dje of ora e subsuelo bira asina cayente door di un di e multiple reaccionan kimico cu por tuma lugar entre e materialnan cu ta worde benta na dump cu e mes ta pega candela. En fin esaki ta muestra cu no tin control riba e landfill. Hopi biaha cu tin candela grandi manera cu a tuma lugar siman pasa, e ta worde sendi intencionalmente pero nunca ningun hende no ta worde poni responsabel pe. Ta worde bisa cu tin hende cu ta subi e tereno via lama y cu nan por ta personanan peligroso tambe cu ta bin busca materialnan y artefactonan cu ainda por worde utiliza. “Pero e realidad ta cu nos ta biba



den siglo 21 unda cu tur pais na mundo y vooral Aruba, cu ta depende di su bunitesa y su medio ambiente, pa sigui pone nos industria turistico crece, no por acepta e hecho aki mas!”. Solucionnan cu a worde treci durante Gobierno anterior no a duna resultado pero a costa nos pais hopi miyones di Florin. Berdad cu Gobierno kier ta cauteloso y no kier bin cu un systema cu no traha pero tempo a yega pa para locual ta tumando lugar riba dump. “Huma cu ta origina di kimamento di sushi domestico ta contene gasnan venenoso cy ta causa malesa di pulmon y cancer”,

Donny ta expresa. Gabinete Mike Eman a cumpli mas di 6 aña den Gobernacion y a priminti algo mucho mas mihor como solucion. “Nos Gobierno mester cumpli! Ta pesey nos fraccion ta pidi un reunion publico unda cu ta pidi Ministernan Sevinger, De Meza y Schwengle nan presencia pa asina debati riba e topico y termina e reunion cu mocionnan concreto pa Gobierno soluciona e problemanan ya menciona mas pronto posibel. “E vecindario a duna hopi caba di su mes, ora a yega pa kita e pesadiya di e barrio mas pronto posibel”, Rasmijn ta termina.